

المسلسلات المصرية وفن الأقورة

شهر رمضان هو أعظم وأكثر شهر مقدس عند المسلمين، لكن محدش يقدر ينكر إن شهر رمضان برضو هو أكثر وقت شركات الإنتاج بتصنع فيه فلوس بسبب كمية المسلسلات الهائلة اللي بتطلع منه. أنا—كشاب مصري عربي محدود الدخل—قررت في رمضان اللي فات إني أدّي فرصة لمسلسل مصري جديد من نوعية الخيال العلمي اللي نادراً ما بشوفها في الإنتاجات العربية، غالباً بسبب إن نوعية المسلسلات دي بتتكلف وقت وأموال وجهود أكثر من المسلسلات الدرامية الاجتماعية اللي مفيش منها أول أو آخر.

مع إن المجهود كان باين على المسلسل، إلا أني وجدت فيه المشكلة الفانية اللي دايماً بشوفها في المسلسلات العربية—الأقورة.

الأقورة يا عزيزي القارئ هي ما تعرف بالمبالغة التعبيرية على وجوه الممثلين في وقت تمثيل مشهد ما. غالباً بيبقا ردود فعل صعب أنك تشوف حد يعمل زيها في الحياة العادية أو إنها بتكون مش مناسبة على الإطلاق للموقف الدرامي. بما إن مصر هي الدولة الأولى والأكبر في إنتاج وتوزيع المسلسلات الدرامية، فهي أيضاً أكبر دولة في تصدير الأقورة. ونفس الأقورة دي هي اللي بتنفر مشاهدين مثلي عن مشاهدة التلفزيون والمسلسلات دي، ده غير طبعا ان معظمها ممل من الناحية الدرامية و مش بيزود فايده لمحيط المسلسلات الموجودة الغير مختلفة عن سابقتها ولاحقتها. وطبعاً مش محتاج أقول إن المسلسلات دي بتصور

العنف الأسري كأنها حاجة عادية وحاجات تانية أوحش بكتير عن كده—بس أنا مش هتكلم عن ده دلوقتي. نرجع لموضوعنا.

من سنة كده، أحد أصدقائي على الفايسبوك شارك مقطع فيديو للممثل بيومي فؤاد، اللي سعد لذروة مجده في السنين الأربعة أو الخمسة اللي فاتوا بتأدية مشاهد كوميدية في مسلسلات مختلفة. لكن المشهد ده كان مشهد حزين ومؤثر، كان بيعبر فيه عن الأسى اللي حس بيه لما عرف إن حد من الناس اللي قريين منه مات. المشهد كان صادق لإن بيومي فؤاد عرف إزاي يخلي تعابير وشه توصل للمشاهد اللي بيحس بيه فعلا جوه قلبه من غير زعيق أو أفورة.

لو كان للمسلسلات المصرية باروميتر لقياس الصراخ والزعيق والانهيارات اللي بتمر بيها الممثلات والممثلين المصريين كل حلقة، لكان انفجر الباروميتر. الموضوع وصل إنه بقا أشبه بمسابقة عن مين أكثر ممثلة تقدر تصرخ أو تعيط عشان توصل اللي جواها بطريقة غير ساخرة، والمشاهدين هما الحكام. لكن الموضوع مش شطارة أو حرفة، ومش حاجة صعبة إن أي إنسان يقدر يعملها. زمن الميلودراما بتاع الثلاثينات والأربعينات من القرن الماضي انتهى عهده لكن للأسف الممثلين معروفوش يغيروا منه لحد النهاردة.

عشان أقدر أوصل فكرتي أكثر، عايز أقتبس شوية كلام قاله الممثل نور الشريف في ورشة فنية لتعليم التمثيل في ٢٠٠٦ في الكويت. نور الشريف كان بيشرح إن في ممثل أوفر وفي ممثل أندر (بمعنى إنها عكس الأوفر). وأبدى إعجابه بالممثل الأمريكي مارلون براندو اللي بيعتبره أكثر ممثل أندر شافه في حياته لأنه يقدر يقول كتير أوي بقليل أوي. وإن المخرج لو

مش فاهم أسلوب الممثل، ده يقدر يدمر الممثل. وبيتكلم أيضا عن إن الجيل الجديد من الممثلين (اللي نشأوا في فترة الثمانينات) تعبيرات وشوشهم بتبقا زيادة عن اللزوم ويوصف ان الاندماج المبالغ فيه بيبقا حالة مرضية.

نور الشريف—وأنا برضو—مش ضد ان الممثل يتمادى في ردود فعله بالصراخ والهيستيريا. لكن لما الموضوع يزيد عن حده في عدد المرات الممثل ده بيعمل كده وان هو ده بقا النهج المتبع في المسلسلات العربية، تبقا هي دي المشكلة. واللوم بيقع مش بس على الممثل، لكن برضو على الكاتب والمصور والمخرج.

أنصحكم إنكوا تتفرجوا على الفيديو ده لأنه شرح مهم جدا لأداء الممثل من الراحل نور الشريف—ممکن تبدأوا الفيديو من الدقيقة ١٩:٣٦ لو عايزين تدخلوا على طول في اللحظة اللي بيبدأ فيها يتكلم عن الأثورة:



أنا اتفرجت على مشاهد كثير في حياتي لما الشخصية الرئيسية أو واحد من الشخصيات الرئيسية بيعدى بموقف حزين جدا فيضطر إنه يعبر عن أساه بشدة أو حرقه من غير ما يبان إنه مصطنع أو انه أوفر. واحد من المشاهد دي اللي عمرى ما هنساها هو المشهد الختامي في فيلم "الأب الروحي: الجزء الثالث" لما آل باتشينو كان بيصرخ على بنته اللي أتقلت أدام عينه. روبيرت دي نيرو وممثلين كثير اتفقوا على ان ده أعظم مشهد درامي حزين في تاريخ السينما الحديثة وده مع إن صرخة آل باتشينو بقت صامتة بعد المونتاج، إلا أنك ممكن تسمع صراخه وتحس بأمله في نفس الوقت—وأنا مقدرش مقولش أني حسيت بنفس الشيء.



كل كلامي ده ميمنعش ان فيه مسلسلات ظهرت في العشر السنين اللي فاتوا بيناقشوا قضايا مهمة بتحصل في المجتمعات العربية وبتمثيل صادق ومعبر خالي من السطحية والأفورة وأقربهم إلى قلبي هيفضل "سابع جار".

لكن الحقيقة، عزيزي القارئ، أنا مش عارف امتا المستوى الفني بتاع المسلسلات العربية هيرتقي ويقدر ينافس المسلسلات الغربية (اللي أنا مبتفرجش غير عليها، للأسف) لكن أنا هفضل متفائل ان في أجيال قادمة هترفع من المستوى ده وإن يبقا فيه تنوع في المسلسلات الدرامية والقضايا اللي بتناقشها مع زوال القيود على حرية التعبير وان المنتجين يبطلوا يعتبروا المسلسلات دي آلات لتصنيع الأموال و"المشي مع الترنند" وان هما يبصوا ليها على انها عمل فني خالص ومضني.

الخلاصة: أرجوكوا بطلوا أفورة.